

- केन्द्र सरकार एक देश-एक चुनाव रा बारा मांय बणायी ज्यी आला दर्जा री समिति री सिफारिशां मंजूर कीनी।
- राष्ट्रपति द्रौपदी मुर्मू अनुसंधान अर विकास रा हलका मांय महिलावां री भागीदारी ने देश री बरकत सारू खास बतायी।
- प्रदेश रा आंगनबाड़ी केन्द्रां माथे 36 लाख बच्चां ने सप्ताह मांय 3 दिन दूध मुहैया करायो जावेला।
- राज्य रा न्यारा-न्यारा हलकां मांय आज ई बिरखा व्ही-धौलपुर अर भरतपुर जिलां मांय कठे-कठे भारी बरसात रा आसार।

000

केन्द्र सरकार एक राष्ट्र एक चुनाव रा बारा मांय राय देवण सारू बणायी ज्यी समिति री सिफारिशां मंजूर कर लीनी है। सूचना अर प्रसारण मंत्री अश्विनी वैष्णव आज नई दिल्ली मांय खबरनवीसां ने आ जाणकारी दीनी। वे बतायो के पैली वाळा राष्ट्रपति रामनाथ कोविंद री सदरत वाळी आला दर्जा री समिति सियासी पार्टियां अर जाणकारां समेत न्यारा-न्यारा संबंधित लोगां सागे विचार कीनो। वैष्णव बतायो के एक राष्ट्र एक चुनाव री सोच दो दौर मांय लागू करी जावेला। पैला दौर मांय लोकसभा अर विधानसभा चुनाव एके सागे व्हेला, जदके पंचायत अर नगर पालिका सरीखा स्थानीय निकाय चुनाव आम चुनाव रा 100 दिन री मियाद मांय कराया जावेला।

.....

सूचना अर प्रसारण मंत्री ओ ई बतायो के सरकार फॉस्फेट अर पोटेश वाळी खाद माथे सिंयाळू सीजन 2024-2025 सारू पोषक तत्व आधारित सब्सिडी री रेट ने मंजूरी दे दीनी है। केंद्रीय मंत्री बतायो के सरकार 79 हजार 156 करोड़ रुपया रा कुल खर्च वाळा प्रधानमंत्री जनजातीय उन्नत ग्राम अभियान ने ई मंजूरी दे दीनी है। वैष्णव बतायो के सरकार विज्ञान अर प्रौद्योगिकी हलका ने बधावो देवण सारू चंद्रयान-4 मिशन अर वीनस ऑर्बिटर मिशन ने ई मंजूरी दे दीनी है। वे बतायो के कैबिनेट एनिमेशन, विजुअल इफेक्ट्स, गेमिंग, कॉमिक्स अर एक्सटेंडेड रियलिटी सारू राष्ट्रीय उत्कृष्टता केंद्र खोलण री अर बायोटेक्नोलॉजी रिसर्च इनोवेशन अर उद्यमिता विकास योजना चलावण री मंजूरी ई दे दीनी।

00000

राष्ट्रपति श्रीमती द्रौपदी मुर्मू तकनीकी शिक्षा रा हलका मांय देश ने दुनिया मांय अगाड़ी बणावण सारू प्रौद्योगिकी संस्थानां ऊं मिल र काम करण बाबत कह्यो है। वे आज जयपुर रा मालवीय राष्ट्रीय प्रौद्योगिकी संस्थान रा 18 वां दीक्षांत समारोह मांय बोल रही ही। राष्ट्रपति सोना रा 20 मांय ऊं 12 तमगा छात्रावां ने मिलण परां खुशी जताता थकां कह्यो के लड़कियां रे आगे बढबा ऊं देश तेजी ऊं विकास करेला। वे एमएनआईटी मांय एक तिहाई महिला प्राध्यापक व्हेवण ने ई खास बतायो। वे कह्यो के राष्ट्रीय महत्त्व रा संस्थानां रा विद्यार्थियां ऊं राष्ट्र प्रथम री भावना ऊं काम करण री उम्मीद स्वाभाविक है।

.....

जळसा मांय राष्ट्रपति स्नातक रा 805, स्नातकोत्तर रा 477 अर पी.एच.डी. पूरी करण वाळा 79 जणां ने डिग्री दे र नवाजा। राष्ट्रपति विद्यार्थियां रा रेहवास सारू अरावली हॉस्टल रो उद्घाटन ई कीनो। कार्यक्रम मांय राज्यपाल हरिभाऊ बागड़े नौजवानां ऊं तकनीकी ज्ञान ने देश रा विकास मांय काम लेवण बाबत कह्यो। वे एमएनआईटी मांय 'आर्टिफिशियल इंटेलिजेंस' विभाग खोलण री सराहवना करता थकां कह्यो के यांत्रिक ज्ञान ज़रूरी है, पण ज्ञान सागे नैतिक अर मानवीय मूल्य जुड़्या रेहवण परां ही सबका साथ, सबका विकास ने सही मायना मांय कामयाब कर्यो जा सकेला। राज्यपाल विद्यार्थियां ने कुदरत सागे तालमेल राखण अर हर काम ने लगन ऊं करण माथे ज़ोर दीनो। ई मौके मुख्यमंत्री भजन लाल शर्मा कह्यो के राज्य सरकार हर साल 4 लाख सरकारी नौकरियां देवणो तय कीनो है। वे कह्यो के राज्य सरकार ई साल एक लाख नौजवानां री भर्ती करेला। मुख्यमंत्री कह्यो के राज्य सरकार बेगी ई युवा नीति अर स्टेट स्किल पॉलिसी लावेला। कार्यक्रम मांय एमएनआईटी रा निदेशक प्रो. एन. पी. पाठी संस्थान रो प्रगति प्रतिवेदन पेश करता थकां कह्यो के संस्थान ने शोध अर अनुसंधान मांय 15 पेटेंट मिल्या है।

वित्त मंत्री निर्मला सीतारमण आज नई दिल्ली मांय नाबालिग टाबर— टाबरियां सारू एनपीएस योजना वात्सल्य री सारूआत कीनी। ई कार्यक्रम ऊं जयपुर समेत देश रा 75 शहरां ऊं बैंकां रा अहलकार, कर्मचारी अर इण रो फायदो लेवण वाळा वर्चुअल तरीका ऊं जुड्या। जयपुर मांय राखी ज्या कार्यक्रम मांय राज्य स्तर री बैंकर्स समिति रा संयोजक हर्षद कुमार सोलंकी, राष्ट्रीय कृषि अर ग्रामीण विकास बैंक— नाबार्ड रा उप महाप्रबंधक विद्वान भगत, भारतीय रिजर्व बैंक रा सहायक महाप्रबंधक मनीष मंडल ई योजना ऊं जुडबा वाळा 26 बच्चां ने स्थायी सेवानिवृत्ति खाता संख्या रा कार्ड दीना। ई मौके सोलंकी बतायो के ई योजना मांय मायत बच्चां रा नाम ऊं सालाना कम ती कम एक हजार रूप्या रो निवेश कर सके है।

.....

ध्यानजोग है के ई योजना ने पेंशन फंड विनियामक अर विकास प्राधिकरण (पीएफआरडीए) चलावेला।

000

प्रदेश रा 62 हजार आंगनबाड़ी केन्द्रां मांय आवण वाळा करीब 36 लाख बच्चां ने सप्ताह मांय 3 दिन दूध मुहैया करायो जावेला। उपमुख्यमंत्री दिया कुमारी आज जयपुर मांय महिला अर बाल विकास विभाग रा अहलकारा सागे मीटिंग मांय ई सारू जरूरी प्रक्रिया बेगी पूरी करण रा हुकम दीना। ध्यानजोग है के चालू माली साल रा पूरा बजट रा बिन्दु संख्या 88 मांय आंगनबाड़ी केन्द्रां माथे बच्चां ने उचित पौष्टिक आहार रा तौर ऊं सप्ताह मांय तीन दिन दूध मुहैया करायो जावणो है। ई सारू मिल्क पावडर री खरीदी माथे हर साल करीब 200 करोड़ रूप्या खर्च कर्या जावेला।

000000

प्रदेश मांय चलायी जा रही मुख्यमंत्री आयुष्मान आरोग्य योजना रा तैत अब सरकारी अस्पतालां सागे गैर सरकारी अस्पतालां मांय ईलाज रो सुबीतो गांवां मांय ई मिल सकेला। चिकित्सा अर स्वास्थ्य मंत्री गजेन्द्र सिंह खीवसर ई बाबत् हुकम दीना है।

00000

प्रधानमंत्री नरेन्द्र मोदी री अगुवाई वाळी केन्द्र सरकार रा तीजा कार्यकाल रा पहला एक सौ दिन मांय करी ज्या खास कामां री जाणकारी देवण सारू आकाशवाणी जयपुर रा प्रादेशिक समाचार बुलेटिनां मांय खास श्रृंखला चलायी ज्यी है। आज पेश है नौजवानां ने आगे बधावण सारू सरकार रा फैसलां री जाणकारी।

.....

000000

प्रदेश रा न्यारा—न्यारा हलकां मांय आज हल्की ऊं मझला दर्जा री बारिश व्ही। श्रीगंगानगर जिला रा सादुलशहर हलका मांय बिरखा व्ही, जद के मंझुवाश अर जिला मुख्यालय समेत न्यारा—न्यारा हलकां मांय आंधी चाली। हनुमानगढ मांय ई बिरखा व्हेवण रा समाचार है। चूरु अर आरे—सारे रा गांवा मांय व्ही बिरखा ऊं राजी किसान ई बिरखा ऊं साखां ने फायदो व्हेवण री आस लगा रह्या है। सीकर जिला रा राजोली मांय तेज बरसात व्ही। भरतपुर मांय आखा दिन बिरखा व्हेती रही। धौलपुर मांय ई चोखी बिरखा रा समाचार है। करौली अर आरे—सारे रा हलका मांय रूक—रूक र व्हे रही बिरखा ऊं गर्मी ऊं साता मिली है। झालावाड़ अर डूंगरपुर मांय सिंज्या री पोर बिरखा रा समाचार है।

मौसम विभाग आज जयपुर, अजमेर अर कोटा संभाग रा कुछ हलका मांय बिरखा रा आसार जताया है। मौसम विभाग रा जयपुर केन्द्र रा निदेशक राधेश्याम शर्मा बतायो के आज धौलपुर अर भरतपुर जिलां मांय कठे—कठे चोखी बिरखा रा आसार है।

00000

आखिर मांय खास समाचार एक र फेर ऊं सुण लिराओ—

- केन्द्र सरकार एक देश—एक चुनाव रा बारा मांय बणायी ज्यी आला दर्जा री समिति री सिफारिशां मंजूर कीनी।
- राष्ट्रपति द्रौपदी मुर्मू अनुसंधान अर विकास रा हलका मांय महिलावां री भागीदारी ने देश री बरकत सारू खास बतायी।
- प्रदेश रा आंगनबाड़ी केन्द्रां माथे 36 लाख बच्चां ने सप्ताह मांय 3 दिन दूध मुहैया करायो जावेला।

- राज्य रा न्यारा-न्यारा हलकां मांय आज ई बिरखा व्ही-धौलपुर अर भरतपुर जिलां मांय कटे-कटे भारी बरसात रा आसार ।